

COMUNICATO STAMPA

FESTIVAL PEUPLES MINORITAIRES DI AOSTE

ON. CAVERI: ALÇÂ LA VÔS CUINTRI IL PATAF AE LENGHE FURLANE

Aoste, ai 8 di Setembar 2012 - "Si scugne tignî alte la vuardie e manifestâ dute la nestre solidarietât al Friûl che al à subît un biel pataf ae sô dignitât storiche e linguistiche di bande dal Guvier. O soi restât mâl par chel che si pues forsît considerâ un at di ignorance, ma sot sot o ai traviodût un plui gjenerâl disen di un Paîs che al intint scjafoiâ lis autonomiis e lis diferencis".

Lu à dit l'onorevul Luciano Caveri, bielzà europarlamentâr e un dai paris de leç 482/99 che e à stabilît pe prime volte la esistence e la promozion des minorancis storichis di Italie, a proposit dal decret dal Guvier che al à ometût di considerâ il furlan une lenghe minoritarie dentri de manovre di contigniment de spese publiche tal setôr de istruzion.

Caveri, cumò conseîr regionâl de Val d'Aoste e membri dal Comitât des Regions dal Consei d'Europe, al è intervignût ae cunvigne inmaneade in ocasion dal "Festival des peuples minoritaires" di Aoste indulà che a àn partecipât i rapresentants di disevot minorancis di dute Europe e dal mont, proponint che tal document finâl che al vignarà sotscriet ae fin di bande des delegazions, al sedi fat riferiment in mût esplicit ae "cuestion furlane".

Introdusût dal assessôr regionâl ae Culture e Istruzion, Laurent Viérin, il dibatit si è inricjît des relations dei rapresentants des trê comunitâts ospitis di onôr: il deputât dal Stât francofon de Louisiane, Stephen Ortega, il diretôr de associazion irlandese "Oireachtas na Gaeilgedell" Liam O' Maoladha e il president de ARLeF-Agenzie regionâl pe lenghe furlane, Lorenzo Zanon, delegât dal president de Regjon Renzo Tondo e dal assessôr ae Culture Elio De Anna.

Zanon al à fevelât cul cûr in man a dute la platee di Aoste par domandâ solidarietât. "Nô no vin daûr de nestrîs spalîs un Stât amî dal pont di viste

linguistic. O sês voaltris popui des minorancis di Italie e de Europe i nestri vêrs amîs. Ve che alore us domandìn di alçâ fuarte la vôs insiemit cun nô".

"La sperance - al à zontât Zanon - e je che si sedi tratât di un erôr recuperabil e se cussì nol sarà o sin pronts a puartâ sul plan internazionâl la bataie par difindi la nestre identitât di popul, sigûrs di jessi un piçul ma impuartant tassel in chel maraveôs mosaic che si clame Europe".

Une necessitât condividue di Caveri che al à indicât propit te rêt di solidarietât - lui che al è promotôr de costituzion de 'macroregion' europeane des Alps - il strument par la salvâ lis autonomiis".

Elisabetta Pozzetto

Regione Autonoma Friuli Venezia Giulia
[ARLeF – Agenzie Regionâl pe Lenghe Furlane](#)
Piazza XX Settembre 23
33100 Udine

0039 0432 555724 fax 0432 204158
mob 0039 335 8002058